



Jumat, 11 Pebruari 2022

Ogen: Kejadin 33:9-11



NATAP AYO DIBATA BAS SENINA



'Kukasih kau dengan kasih Tuhan, kukasih kau dengan kasih Tuhan, Kulihat diwajahmu kemulian raja, ku kasih kau dengan kasih Tuhan'. Enda me kata-kata ibas lagu kuga kita nehken kekelengen man senina ntah turangta ibas Kristus.

Renungenta ibas wari enda nuriken 'pupursage' antara Jakub ras seninana Esau. Kenca waktu sindekah, Jakub la jumpa ras Esau sabab Jakub lawes kukuta mamana Laban, je erjabu ras ipasu-pasu Tuhan geluhna. Mulih atena ku kuta kemulihenna, njumpai senina Esau si nai rubati erkiteken pasu-pasu siialoken Jakub alu mbuali bapana Ishak. Amin rubat pe, sempat ibunuh Esau atena si Jakub tapi keleng ate ras tedeh ate ersenina belinen asangkan nembah atena paksa si nai. Jakup pe bageka, reh ia guna erdame alu maba melala luah man kakana. Tapi la ialoken Esau kai siibaba Jakub e, meseksek ipindo Jakub gelah ialoken Esau luahna. Iakukenna maka enggo mbelin kal pasu-pasu Dibata man bana, ikuhi Dibata keperlunna.

Luar biasa perjumpanna dua, kata-kata Jakub man Esau nina 'ngidah ayondu saja bali kuakap bagi natap ayo Dibata, perban ulina perbahanenndu man bangku'. Kata enda tentuna ikataken Jakub erkiteken nggit ras ngasup Esau ngaloken ia, ngalemi salahna Sinai. Bagi Dibata nggit ngaloken manusia kugapa pe kecibalna.

Bagenda me keleng ate ersenina, *kasih storge*, iketen keleng ate erkiteken hubungan dareh. Kegeluhen siersenina Esau ras Jakub enda perlu kal siusih, payo pernah kita rubat, la siangkan, sigeluten tapi erdamelah. Silegin ukur sada ras sidebanna, labo lit dalam kesirangen ibas ersenina. Keleng ate si nggit ngalemi, la naktaki salah lepak, tentuna ipalasi keleng ate Dibata si mbelin ibas kegeluhenta. Keleng ate Dibata me palasna. Sikeleng-kelengenlah kita bagi ersenina.